

20/10/2001

Pemutus litar stabilkan pasaran saham tempatan

KERAJAAN akan melaksanakan mekanisme 'pemutus litar' yang berupaya menyekat sementara dagangan di Bursa Saham Kuala Lumpur (BSKL) ketika mengalami kejatuhan mendadak pada hari urus niaga.

Perdana Menteri Datuk Seri Dr Mahathir Mohamad, berkata cadangan pelaksanaan mekanisme seperti diamalkan di negara maju itu diambil bagi memastikan kestabilan pasaran saham tempatan.

Ia juga bertujuan mengekalkan tahap keyakinan pelabur dan pasaran terutama dalam persekitaran yang tidak menentu, tambahnya.

"Sekatan itu berdasarkan had penggerak yang sudah ditentukan, dengan izin, atau 'masa bernafas' kepada pelabur sebelum menyertai semula pasaran saham," kata Perdana Menteri ketika membentangkan Belanjawan 2002 di Parlimen, semalam.

Katanya, langkah itu dibuat memandangkan prestasi Bursa Saham Kuala Lumpur (BSKL) mengalami turun naik ketara akibat daripada perkembangan bursa utama dunia.

(END)